

Incumbensa da la fracziun da l'Allianza dal Center concernent las consequenzas da la preschientscha d'animals da rapina gronds per l'agricultura (emprim sutsegnader Michael [Donat])

Il dumber d'animals da rapina gronds, en spezial da lufs, che crescha d'in cuntin, ha consequenzas per la cultivaziun dal terren agricul e da las alps. Las furmas da cultivaziun ch'èn vegnidas pratitgadas durant decennis èn en privel u èn pussaivlas mo pli cun bleras resursas persunalas e finanzialas. La chargia psichica e fisica per las famiglias da purs e per il persunal d'alp crescha. Projects da blers onns da la Confederaziun e dals chantuns per promover l'urbarisaziun decentrala, per trair a niz l'agricultura e l'economia d'alp e pia er per mantegnair e per augmentar la qualitat dal spazi da viver per l'uman e per l'animal en il territori da muntogna vegnan mess en dumonda entaifer pauc temp. En il mender cas smanatscha ina depopulaziun da las valladas ed ina desertificaziun da la cuntrada cultivada alpina. Quai avess consequenzas gravantas per il Grischun sco chantun turistic e muntagnard. A quest process latent stoi vegnir fatg frunt. Per pudair valitar la situaziun efectiva incumbenseschan las sutsegnadras ed ils sutsegnaders la Regenza da far in'enquista tar tut ils manaschis agriculs sco er tar tut ils manaschis d'alpegiada. Davart las enconuschientschas che resultan da l'enquista sto il Cussegl grond vegnir infurmà en furma adattada.

Pervia da la preschientscha d'animals da rapina gronds sto l'enquista da las varts pertutgadas directamain resguardar las suandantas dumondas qualitativas e quantitativas. Ils manaschis da chasa ed ils manaschis d'alpegiada ston vegnir servids en moda differenziada:

- È la cumposiziun da las categorias d'animals vegnida midada u terminada en ils manaschis da chasa e d'alpegiada?
- Na vegnan tschertas categorias d'animals betg pli messas ad alp?
- Na vegnan manaschis d'alpegiada, parts da quels u surfatschas utilisadas da l'agricultura betg pli pasculads?
- Han manaschis d'alpegiada u surfatschas utilisadas da l'agricultura stuì vegnir stgargiads anticipadamain?
- Èn avant maun avunda animals alpegiads per cuntanscher la chargiada normala pretendida?
- Èsi vegnì investì en la protecziun da muntaneras e sche gea, en tge dimensiun?
- Datti investiziuns ch'eran previsas en l'infrastructura, ma che n'èn betg vegnidas exequidas u che na vegnan betg exequidas?
- Hai dà midadas dal persunal d'alp e co vegn giuditgada la recrutaziun futura?
- Hai dà dapli chargias psichicas e sforzs fisics tar il persunal d'alp e tar la famiglia dal mainagestium?

(La glista n'è betg definitiva e po vegnir adattada ed amplifitgada conform al senn.)

Cuira, ils 27 d'avust 2021

Michael (Donat), Cramer, Bettinaglio, Berther, Bondolfi, Brunold, Buchli-Mannhart, Caluori, Casty, Casutt-Derungs, Clalüna, Danuser, Della Vedova, Deplazes (Rabius), Derungs, Ellemunter, Epp, Fasani, Florin-Caluori, Föhn, Gugelmann, Hardegger, Kohler, Kunfermann, Lamprecht, Loepfe, Maissen, Märchy-Caduff, Müller (Susch), Niggli-Mathis (Grüsch), Paterlini, Ruckstuhl, Sax, Schmid, Schneider, Tanner, Tomaschett (Breil), Tomaschett-Berther (Trun), Ulber, Widmer (Favugn), Widmer-Spreiter (Cuira), Zanetti (Landquart), Bürgi-Büchel, Büsser, Costa, Gujan-Dönier, Heini